

Takurda-o Burus aco o_wu_gene Timoti

Rem-se ro n-me à:

M-zante 1:1-2

Ur-keweş mosse yan-dor Yeşo ne un sek-ye ye
un o ne 1:3—3:16

Ur-keweş ha-mo un be-ur Timoti mosse un
senge-mo un wu ne 4:1—6:21

Ur-gas

¹⁻² Timoti, Burus ro wo m-gene un ka takurda-
o. Wo m-moka kashi un wa re wu, remen un
yoosutu wo m-sheer be-de Shir. Me, Burus, wan-
Tom Yeşo **Kiristi**,* un beeb-de Shir, **Wan-Gwu** na
un **Kiristi** Yeşo, wu ya'u na o-sakto à.

Me un kon-se Shir Tato na, un Yeşo **Kiristi**,
Wan-Koyan na. Me un kon-se ye 'ye wo yar-mo
un ye, ur-'won ne, un gwugwu-mo ur-hur ne.†

Nak ut-to remen un yan-yoos-de ut-bo

³ Da-de um ro un cow-o re ha-mo o-Makidoniya
à, um rurute wo o she'et n-me bo-o o-Apisu.
She'et kane remen o nekt ye ken hun-ne ye ut-to
kane, ye yage yoos-de ut-bo.

⁴ Rure ye, ye yage naas un da-o hun-ne be-de un
yoos-de ut-zwom, un oog-de un ya-n-ga-ye ne. Ye
yage remen gon ka ma-to ro m-hante sunu-mo ut-
ma. To un gu un hun-ne nom un she'et-de m-sheer
be-de Shir á.

* **Bor-o gaan:1-2 1:1-2** Wu Shir daagne à. † **Bor-o gaan:1-2 1:1-2** Hyen komo: Seng 16:1.

⁵ Yo a cone ko wu ke wan-dor o Shir wu nom à, yo ro m-was un or un wu ne ne. Ka was-mo a rwuun un hur-ur pus-de, un hur-ur gaan ne, komo ur-hur ne de m-she be-de Shir cot.

⁶ Amba ye ken ye jorute ka rem-se Shir cone a nom à, ye warguru be-de un ma-to ba ur-hi.

⁷ Ye conog ye warag ya-ur-yoos-de un **karamsa**-o **Mosa**. Ye m-campo un hyan-o un ye, unze ye nak. Amba ye nap yo ye ur-yoos á.

⁸ A nak **karamsa**-o ro ur-bon ne, urege a nak rii-yo rwo'e Shir hantute o à.

⁹ A nak komo, Shir ya'as o-**karamsa** remen o ja'asté kashi un hun-ne á. Amba Shir un ya'as o remen o ja'asté:

Yan-koob-de un gyer-o un wu,

Un yan-koob-de o-dorotte ne,

Un ya-ut-**ba'as** ne,

Un yan-yage un nom un rii-yo **karamsa**-o zee ne à,

Un ye ro m-yage she'et-de m-kukop ne á,

Yan-koob-de o-dorotte o un Ma-to Shir,

Un ye ro un ho un tat-ne ye un ye ne à,

Un ye ro un ho un in-ne ye un ye ne à,

Myet un yan-ho un hun-ne ne,

¹⁰ Un campo-ne ne ye ro un hoob-o un ne'a-ne à, un ne'a-ne ye ro hoob-o un campo-ne ne à,

Un campo-ne ye ro m-rew un or un ye ne campo-ne bo ye ro m-rew un ne'a-ne un ye ne à,

Ko ne'a-ne ye ro m-rewe un or un ye ne ne'a-ne bo ye ro m-rewe un campo-ne un ye ne à,

Ko ye ro un baab un hun-ne,

Ko ya-ut-bo,

Ko hun-ne ye ro m-yage m-nom un yo ye zee
 yea nom à, un
 Hun-ne ne ye ro un nom un ko se ke rem-se un
 ba ur-bon se à,
 Da-de ye nome kà rem-us yo-se se, ye ro o ka o-
 dorotte un yoos-de o-nip á.

¹¹ Ka yoos-de un **Ma-to m-Rerem** to un rwuun
 be-de Shir wa-m-seps, o-kwum ne. Shir bobsu me
 m-ko'ot to.

Yar-mo Wan-Koyan kute Burus à

¹² Um bomog **Kiristi** Yeso, Wan-Koyan na, wu
 ya'u me ur-beeb um nomot ka senge-mo à, remen
 wu nak mett m-se'er á. Wu daagu me un kà
 senge-mo.

¹³ N-ga um ro m-pyap un Shir, un yage-to un
yan-dor Yeso ne, un 'ya un yan-dor ur-koob ne
 deen. Shir hoguru 'won un de remen me ro nak
 yo um ro m-nom á, komo um ro un koob-de m-
 sher ne be-ur Yeso.‡

¹⁴ Wan-Koyan na ya'ag me yar-mo Shir deen.
 Wu ya'uru me m-sheer, m-was ne, mo rwuune be-
 ur **Kiristi** Yeso à.

¹⁵ Ka ma-to, bo-ut to kon n-me un to á, komo to
 woog a gokste to kap unze, "**Kiristi** Yeso haante
 un hono o-dak wu guut ya-ut-**ba'as**, bo ye he m-
 posse den-o o-ra à." Um nak komo um aragte hun-
 ne kap **ur-ba'as**.

¹⁶ Amba Shir hogute 'won un de, me wu arge
 hun-ne **ur-ba'as** à. **Kiristi** Yeso kututu na mo un

‡ **Bor-o gaan:13 1:13** Hyen komo: Seng 8:3; 9:4-5.

hur-de un wu remen um waragté rii-yo m-sha be-de un kap ye he m-sheer kane n-co à. Ka hun-ne yea kum hoog-o ba m-ta.

¹⁷ Kon-us re se ro hun-ne kap ye 'ye Shir m-seps, ut-gos ne, ba m-ta. Wu ro ko-Gwomo ba m-ta. Wu un ba ur-kom. Wu a m-hyan á. Shir o un hon-de un o, **Amin**.

Burus doote Timoti jaab-o ut-men

¹⁸ Wà re **Timoti**, yo me m-zee o nom à, hond hond yo ro un yo yan-rwor un Ma-to Shir ruru wo ne à. Shir o daagu wo o ko'ote ma-to un wu. Baks un kà ma-to yan-rwor un Ma-to Shir ruru wo ne à, toa do wo jaab-o ut-men un nom un yo Shir zee o nom à.

¹⁹ Da-o wo ro un ko'ot un Ma-to Shir, ma'as n-te m-sheer, komo hur un du kaps wo á. Ye ken hun-ne ye hur-de un ye kapste ye. Remen kaane ye hoks m-sheer be-de Shir á.

²⁰ Himeniyus un Arekanda ro n-me un ka hun-ne ye, ye hur-de un ye ro be-ur gaan á. Um koostu ye be-de un morog-de un **yan-dor Yeso**. Um ya'ag **ko-Gwomo-wu un ya-ut-kot** ur-keer wu nom yo wu cone un ye ne à. Me un nom kaane remen ye yoosté yage un yo'og-o Shir.

Bor-us yoor

Karamsa-o un bo a he bongon-de Shir à

¹ Ur-takan, um conog um 'ye wo jaab-o ut-men un **yan-dor Yeso** ne, unze no senge us-kon Shir remen hun-ne kap. Da-o no ro un kon-se Shir

remen wu guut no, komo kon no Shir hoge 'won-de un hun-ne. Da-o no ro us-kon Shir, no 'ye Shir ur-bongon remen rem-se wu nome à.

² Kon no Shir remen gwomo-ne, un yan-caari-to ut-comos ne, remen a she'eté ba ut-ween be-de un hun-ne. Komo un nom un ko yo ke kashi un rii-yo bo Shir cone à.

³ Da-o a ro us-kon kaane, ro ur-bon ne, komo Shir, o ro **Wan-Gwu** na à, ro m-hoge rerem-mo un kaane deen.

⁴ Rii-yo rwo'e Shir rotte un hoge m-rerem à, Shir conog ko wu ke net-wu kum gwu un nap-o o-nip ne un Yeso.

⁵ Shir gaan-o. Wan-hongse un hun-ne un Shir ne komo gaan. Ka net-wu, wu ro **Kiristi** Yeso.

⁶ Yeso ya'aste hi un de un wu har be-de m-mar, remen wu rurut na kap. Ma-to un mar-m **Kiristi**, Shir ya'ag na m-moka o-da o m-rure hun-ne ka ma-to unze Shir conog ko wu ke net-wu kum gwu.

⁷ Remen ka o Shir tomnu me um waragte wa-o-ko'ot un ko-yan-Tom Yeso ne. Um waragte Wa-ur-Yoos, wan-yoose un ye ro **Yahuda**-ne á, n-me m-she, o-nip ne. Nip-o me m-rwor ba bo-to á.*

⁸ Da-o no morge remen bongon-de Shir, um conog campo-ne ko kene, ye jaks kom-to un ye un kon-se Shir. Da-o ye jakse kom-to un ye, yage hur-de un ye ma'aste ur-kashi be-de Shir, ba us-ryaab ko sune-mo ut-ma.

⁹ Um conog ne'a-ne ye cupe hi un de un ye saw-to m-cop to depe à. Ye cup saw-to he un hok un

* **Bor-uş yoor:7 2:7** Hyen komo: 2Tim 1:11.

wur-to un ye ur-bon ne à. Taase ne'a-ne cup saw-to campo-ne hette ye m-gwot un yish-ye o-yoor á. Taase ye muut ur-hi be-de un saw-to un hwor, rem-se un zinariya, us-rwuumb ne un ga-se un ye á.†

10 Amba kashi m-senge mo depe ne'a-ne à, mo ro nom un rem-se ur-bon un da-o ye kume à, un hwor-ye un ye ne un nom un rem-se ur-bon be-de un hun-ne. Ye ro m-nom kaane yea kute hun-ne unze ye yan-gyer-o Shir ye.

11 Da-o yan-dor morge be-de ur-yoos, yage ne'a-ne ke'et ut-to, ye ma'as un nom o-dorotte un yo a yoose ye à.

12 Yan-dor Yeso morge, me 'ya ne'a cow-yo wu yoosute campo-ne á. Komo me 'ya wu cow wu waragte hi-de un campo á, amba wu ma'as temb.

13 Yo rwo'e um zet kaane à, remen **Adamu** wu Shir ba'e m-nom, ka da-de a nomu **Hawa**.‡

14 Komo ba **Adamu** wu **ko-Gwomo-wu un ya-ut-kot** rakse á, ne'a-wu a rakse har wu waragte wa-**ur-ba'as**.§

15 Myet un kaane ne, Shir a gu ne'a-ne un bu-yo un o-mat, urege ye shereg be-ur Yeso, un was un or un ye ne ne, un she'et-de ba m-kukop ne, ur-she'et ne bo depe à.

Bor-us tet

*Yan-gut-de un yan-dor Yeso
un yan-m-senge ne*

† **Bor-us yoor:9 2:9** Hyen komo: 1Bit 3:3. ‡ **Bor-us yoor:13 2:13** Hyen komo: Taka 2:7,21,22. § **Bor-us yoor:14 2:14** Hyen komo: Taka 3:1-6.

¹ Hun-ne ro m-zee, “Urege net ro ur-gop wu waragte ko-wan-gut-de un **yan-dor Yeso**, wu nomog gop-de un kashi m-senge.” Ka ma-to nip-o.

² Remen kaane, myet net-wu cone wan-gut-de un **yan-dor Yeso** à, kaane she'et-de un wu he m-ma'as:

Untaase a kum gom-de ur-reeb be-de un wu,
 Wu ese be-de un ne'a un wu cot à,
 Wu hokse garamse un hi un de un wu à,
 Wan-barag-se ur-bon,
 Hun-ne ya'as wu ut-gos, remen wu she'ette ur-
 bon ne,
 Wa-m-was un hamat-ne ne n-me un hur-o un
 wu,
 Wu he m-hoks ur-yoos à,

³ Ba ko-wa-m-swo á,
 Wu ro un hoob-o ut-ma á,
 Amba yan-gwegwer-mo ur-hi,
 Wu ro ut-ween á,
 Wu rotte yish-ye un hwor á,

⁴ Wu ro un hoks m-garamse un hur-o un wu ur-
 bon ne à,
 Wu ro m-rwo un yakar-ye un wu ye nomu wu
 o-dorotte, ye 'ye wu ut-gos n-me un ko yo ke
 rii-yo à.

⁵ (Urege net hoks m-garamse hur-o un wu á,
 ¿re wu he m-nom wu hokste gut-de un hun-ne ye
 Shir?)

⁶ Ba wu gokse Yeso ba m-gos á. (Un ya ka á, nu-
 mo ur-hi a ru wu cuwut swo ur-koob untun
ko-Gwomo-wu un ya-ut-kot.)

⁷ Wu rotte be-de ut-reeb á. Kaane depe komo
 hun-ne ye ro **yan-dor Yeso** á, ye ro wu m-
 tan un jin-ur so-de. Wu ma'as kaane remen

untaase wu he'ebe n-me un ceeb-o un **ko-Gwomo-wu un ya-ut-kot**, wu hoge m'e.*

Ya-m-gu ye depe senge-mo Shir à

⁸ Yan-m-senge be-de yan-dor un ce un ye, kaane she'et-de un ye he m-ma'as:

Ye hokse garamse un hi un de un ye à.

Ye warag yan-ma-ut gaan.

Ye ro m-swo á.

Ye rotte suub-o un hwor á.

⁹ Komo ye bup sher-mo un ye un hur-ur gaan.

¹⁰ Rii-yo no degt net ko-wan-m-senge se a me'este wu, no hyane wu rott be-de ut-reeb á, ka da-de wua hoks m-nom un senge-mo un yan-m-senge.

¹¹ Kaane komo ne'a-ne ye un ye warag kashi un ne'a-ne ye un ba ur-reeb, ba komo ya-ut-we á. Amba ye hokse she'et-de un ye à. Hun-ne ro ye m-'woş un ma-ut gaan ne koyanda.

¹² Ko-wan-m-senge n-me un den-o Shir, ko wu ke wu es be-de un ne'a un wu cot. Komo wu hoks garamse un hur-o un wu un yakar-ye un wu ne ur-bon ne.

¹³ Hun-ne ro m-'ya un yan-m-senge-ye nome senge-mo ur-bon à m-sek. Remen kaane, ka yan-m-senge-ye, yea hoks rure un hun-ne ma-to m-sheer be-ur **Kiristi** Yeşo, ba o-gyer.

*Ma-to ro wukusse
n-me yan-dor Yeşo à*

¹⁴ Da-o me wo un gene un kà takurda-o à, me o-sakto o m-habe um hyenet wo ba m-goš.

* **Bor-us tet:7 3:2-7** Hyen komo: Titu 1:6-9.

¹⁵ Amba me nome m-it, kà takurda-o he wo m-kute bo hun-ne he m-she'et à be-de yan-dor o-Shir. Hun-ne ye Shir ye ro un den-o Shir wan-hoog à. Kà hun-ne ye, ye ro untun caar-yo o-cin un 'wunde o-nip ne.

¹⁶ Nip-o, m-sheer be-de Shir ro m-'wons ne ko de nomte se ken rem-se rokon wukusse à:

Yeso haante n-me o-wur untun o ma na,

Kuḱt-o Shir kutute na wu kashi un net-wu.

Yan-tom-ye Shir ye hyanag wu.

Yan-dor Yeso ko'ote ma-to un wu

be-de hun-ne kap hono o-dak.

Hun-ne gokste kà ko'ot-o be-ut-be hono o-dak kap.

Shir deku wu ha-m o n-Ton be-de m-seps.

Bor-us nass

Ya-ur-yoos-de ut-bo

¹ **Kuḱt-o Shir** rurutu na cas unze un kà ho-to ur-kom to, ye ken ye a yage m-sheer be-de un yoos-de o-nip de un Ma-to Shir. Yea sheer be-de un yoos-de un ya-ut-bo, to rwuune be-de un **ya-ut-kot** à.

² Ka hun-ne ye ro m-nom sa o zee nip-o ye m-rwor, amba bo-to ye he senge m-kupur. Yea was á, ko yo ye ro ur-yoos à nip-o ko ut-bo á, remen hur-de un ye kapste ye.

³ Bo **Kuḱt-o Shir** rwore à, hun-ne ye ut-bo ro kon ko m-moka:

Ye ro ur-yoos de ut-bo unze taase hun-ne ge ut-ge.

Komo ye ro m-zee taase hun-ne re to ken rii-to m-re to.

Amba Shir nome ut-ge un ko yo ke rii-yo m-re yo ne. Shir conog ya-m-sheer ye nep nip-o un wu,

komo ye 'ye wu ur-bongon remen ka rii-to, otte m-zee to rott ur-bon á.

⁴ Myet rii-yo Shir nome à ro ur-bon ne, taase a yage ko rii á. Amba a goks yo kom-ut yoor un hur-de ur-bongon ne.

⁵ A nepste Ma-to Shir to he yo m-muut ba m-kukop us-toog ne.

*Ko-yan-m-guw wu ur-bon
wu ma Yeso Kiristi*

⁶ Urege o yoosute or ru ne yan-dor gon ka ma-to, woá warag kashi un ko-ya-m-Rwor un ma-ut **Kiristi** Yeso, komo Shir a ru wo o bo'osute un ma-to m-sheer remen yoos-de ur-bon de wo m-nome o-dorotte har m-moka à.

⁷ Nom ja un yoos-de ut-bo ne, taase o sher hoog ru be-de ut-zwom to o-hwaa to ro un gu un hun-ne ye'et Shir m-sek á. O yoose hi un du bo o he ur-she'et de Shir cone o she'et à n-me un ko yo ke rii-yo.

⁸ Nom kaane o nak hun-ne ro m-zee, "Ro ur-bon ne net senge nukt un wur-o un wu bo o he nom m-'wons à." Remen wur-o ro m-'wons ne à, ro un gu un net da-o un hoog-mo un wu. Amba jiishte ur-bon net she'et gon she'et-de Shir cone wu she'et à. Remen she'et-de Shir cone hun-ne she'et à, ro un gu un net da-o un hoog-mo un wu un ka hono o-dak o ko ne da-o net mare à.

⁹ Ka ma-to, to hun-ne ro m-rwor à, nip-o komo to woose a goks-to kom-ut yoor.

¹⁰ Remen kaane a nom no bo m-nom na. A she'ete un bu-yo un ka ma-to, a nom kaane remen a hwoog sakto-o na be-de Shir o un hoog. Wu ro

Wan-Gwu o un hun-ne kap, yagunte ma ye shere à.

¹¹ Yoose yan-dor myet ka ma-to um gene à, komo rwo ye nom o-dorotte un ká ma-to.

¹² Taase o yage hun-ne gut hi un du ba us-shi á, remen wo monge á. Amba senge yoos un du. Komo yage she'et un du ma'as rii-yo ur-yoos be-de un **yan-dor Yeso** bo depe ye she'et à: Cep ma-to ur-bon. Nom rii-yo ur-bon. Was un hun-ne ne. Sher be-de Shir. Komo o ma'as un hur-ur pus-de ne.

¹³ Rii-yo um woobute, o senge m-karante Ma-to Shir be-de un hun-ne da-o ye morge. O do ye jaab-o ut-men. O yoosu ye **Ma-to m-Rerem** un yo Shir zee ye nom à.

¹⁴ Baks da-o sek-ye un yan-dor ne hwo kom-to un ye to o-kwum be un du ye us-kon à. Bo sek-ye nome kaane à, Shir ya'ag wo yar-mo o-Kukt remen o nomot senge-mo un wu. Shir un bu-yo un Kukt-o un wu rwo'og ye rurutu wo unze wua gu wo un kà senge-mo. Wo jar o yage ka senge-mo Shir zee wua gu wo m-nom á.

¹⁵ Ma'as m-nom un ka senge-mo un hur-ur gaan. Ka da-de ne, hun-ne myet a hyen wo m-nom un yo Shir cone o nom à.

¹⁶ Nom ceen o senge nome un Shir o-dorotte un ko yo ke rii-yo. Komo yoos un du ma'as de o-nip. O senge m-nom un ka rem-se, remen Shir guut wo un ye dore ka yoos-de ne à.

Bor-us taan

*Bo o he she'et-de ur-bon
un hun-ne ne à*

¹ Wo kwòs net sek-wu ut-gaag á, amba nom wu ut-ma sa o zee tato ru. Komo o gut campo-ne sa o zee hen-ne ru.

² O gut ne'a-ne ye mongse à, sa o zee in-ne ru. Yan-ne'a-ne komo o gut ye untun hen-ne ru ne. O nom kaane un men-ut pus-to puu.

Bo depe a was un gwor-ne ne à

³ Was un gwor-ne ne, ye campo un ye ne mare à, ye rotte ye he ye m-gwot á.

⁴ Amba urege ka ko-gwor-wu ro un yakar-ne, ko ne hes-ne, yage ye dekt nu-se un wu. Yoose ye, ye nom kaane be-de un baag-o un ye. Un ka bu-yo, ye he m-top un rii-yo tat-ne ye un ye ne mong-ne nomu ye à. Da-o hun-ne nome kaane, Shir ro un hoge o-zak deen.

⁵ Amba gu no ko-gwor-wu rotte net-wu he wu m-gu á. Wu rwo'e sakto-o un wu be-de Shir à. Wu ro un kon-se Shir m-how, m-tet ne, remen wu kumut gwu à.

⁶ Amba taase no gu ko-gwor-wu ro un nom yo men-to un wu cone à, yanze yo Shir cone wu nom á. Ka ko-gwor-wu sa o zee ko-margan-wu ro, ko de nomte wu ro un hoog ne à.

⁷ Yoose **yan-dor Yeso** ka ma-to remen taase hun-ne kum rii-yo ut-reeb be-de un ye.

⁸ Amba urege wu ken net-wu ro un was un yan-baag-o un wu ne á, ko ne yan-hur-o un wu, rii yo-yo yo. Ka net-wu she'eg sher-mo un wu o ka, komo wu aragte wu shere be-ur Yeso á m-naase.

⁹ Un morog-de un **yan-dor Yeso**, yage ye kum o-takurda, un ka takurda-o ye gen jin-to un gwor-ne. Taase no gen ko-gwor se:

Wu woog us-hak kwooz-ut tet [60].

Wu ese-be-de un campo un wu cot, da-o campo un wu ro un hoog ne à.

¹⁰ Wu hun-ne ro un 'ya m-sek remen wu ro m-nom rii-yo ur-bon à.

Wu ro un yoose un yakar-ye un wu ur-bon ne ne à.

Wu ro un barke un hamat-ne un hur-o un wu à.

Wu ro un nome un **yan-dor Yeso** m-guw un gwugwer-mo ur-hi ne à.

Wu ro un gu un or un wu ne yan-dor à ye ro ur-koob à.

Komo n-me un koyan wu ya'aste hi un du un wu be-de un nom un rii-yo ur-bon.

¹¹ Untaase no gen jin-de ne'a wu wo us-hak kwooz-ut tet [60] á. No gen ye á, remen da-de con-to un wur-o un ye hokse ye, yea cun ye ge ut-ge komo. Da-o ye ga ut-ge à, ye jorute o ka swor o-nu o ye nome un **Kiristi**, unze yea ge ut-ge á.

¹² Ka da-de ne hur-de un ye a kaps ye, remen ye shakte swor o-nu o un ye o n-ga.

¹³ Rii-yo rwo'e komo um zet taase no gen jin-to gwor-ne ye haks-se un ye arge kwooz-ut tet [60] á, yo ro yea hoks m-yoos un she'et-de o-hwaa. Ye un naas un da-o un ye un dorog-to un hur-to un hun-ne. Yanze she'et-de o-hwaa temb á, amba ut-we ne, komo ye ro m-hwo un nu-se un ye un ma-to un hun-ne. Ye ro komo un cep un ma-to depe ye cep á.

¹⁴ O rwo'e um rurute gwor-ne ye haks-se un ye arge kwooz-ut tet [60] á, ye ge ut-ge, ye met yakar. Komo yea ma'as un gut-de un hur-to un ye, remen

taase a 'ye yan-yage-ut na o-cow ye nomotu na ma-to o-yo'og.

¹⁵ Me-m-rwor un ka ma-to, remen ye ken gwor-ne ye be'essute, ye waktussute, yan-dore un **ko-Gwomo-wu un ya-ut-kot**.

¹⁶ Bo um ro zeeg un ka da-o à, urege wu ken ne'a-wu ko-yan-dor, ro un ko-gwor ne be-de un baag-o un ye, wu gu ye. Wu yakse **yan-dor Yeso** nu-se un ye á. Ka da-de ne **yan-dor Yeso** he kum un beeb-de un gu un gwor-ne ye rotte yan-gwu á.

*Yoos-de un sek-ye ya-m-guw
un den-o Shir*

¹⁷ Sek-ye, ye nome senge-mo un dorotte un **yan-dor Yeso** bo depe à, depete komo a 'ye ye m-sek, ur'yons ne m-sok ne. Ka ye senge-mo un ye ro ur-yoos, un ko'ot un Ma-to Shir ne à.

¹⁸ Ma-to Shir zeeg, "Wo bite nu-o o-janka da-de yo ro m-door á."* Komo "Wa-m-senge depete a ya'as wu 'yons-de un wu."†

¹⁹ Urege net wan-gaan zeeg wu ken ko-sek-wu nomog **ur-ba'as**, wo dek ka ma-to hor-m-hor á. Se o kumug ya-üş-tor, nen yoor ko nen tet, ka da-de, o dekt ka ma-to.‡

²⁰ Wo nipse unze nip-o wu ken ko-sek-wu nomog **ur-ba'as**, o kwos wu un yish-ye un ko wu ke **wan-dor Yeso** wu. Nom kaane remen ye kuse à, ye hogute o-gyer o un nom **ur-ba'as**.

²¹ Kwos net-wu nome **ur-ba'as** à, taase o was un con-de un wu ne. Um mossute wo un Shir

* **Bor-üş taan:18 5:18** Hyen komo: Kara 25:4. † **Bor-üş taan:18 5:18** Hyen komo: Mati 10:10; Ruka 10:7. ‡ **Bor-üş taan:19 5:19** Hyen komo: Kara 17:6; 19:15.

ne, un **Kiristi** Yeso ne, un yan-tom ye Shir ne, ye ro wo m-gwoť komo yea piishi wo ut-ma urege o yagute m-nom kaane.

²² Wo cune m-daag un sek-wu, wo nom m-hor á. Rii-yo o huutu wu kom-ut ru to o-kwum, o ceker ko kashi un net-wu à. Wo nome ceen á, wo a deeg ko-wa-**ur-ba'as**. Komo hun-ne a hoks m-zee wo was un **ba'as-de** un wu ne á. Amba wo, she'et she'et-de un ba m-kukop.

²³ Wo ma'as un swo m-ho un hon-de un mo á, amba o su modi-m ut hiin remen hoog-mo men-ut ru un gom-us ru ne co co.

²⁴ Ba'as-to un ye ken ye cas to ro, komo kowan nepse Shir a piishi ye ut-ma. Amba ye ken ye se o-co **ba'as-to** un ye rotte m-rwuun cas.

²⁵ Ka o komo senge-mo ur-bon ya mo ro cas, ko a nom mo wukusse, da-o ro kon o mo hette m-rwuun cas à.

Bor-us cind

Bo depe guw-ne 'ye yan-hur-o un ye m-sek à

¹ Ye ro guw-ne à, ye 'ye yan-hur-o un ye m-sek koyanda bo depe à. Yage ye ye'et ye m-sek taase hun-ne pyep jin-de Shir, komo ye zee yoos-ur na rott ur-bon á.

² Urege yan-hur-o un ye yan-dor ye, to guw-ne taase ye nom koob-de o-dorotte remen yan-dor ye. Amba ye do rwo ur-hi be-de un nome un ye m-senge. Yo rwo'e ye hette m-nom kaane à, da-o ye ro yan-hur-o un ye m-gu, ye o ka m-gu un or ye ne **yan-dor Yeso**.

Yoos-de ut-bo un kwum-o o-nip ne

Ka ma-to o he ye m-yoose à, o do ye jaab-o ut-men ye dore to.

³ Ye ken hun-ne ye ro un yoos-de ut-bo un rem-se Shir. Ye ro m-she un yoos-de o-nip un ma-ut Yeşo **Kiristi** ne, Wan-Koyan na. Yoos-de un ye ro un gu un hun-ne she'et-de Shir cone á.

⁴ Ka hun-ne ye peneg uku o-cin. Ye ro m-hyan sa o zee ye nepse koyan, amba ye nap rii-yo ye ur-yoos á. Ye ro un hoge un rerem-mo un sune-mo un Ma-to Shir, sa o zee yan-hoob-o ut-ween. Go un kaane ro m-hante ur-shoob, ut-reeb ne, un ma-ut yo-to ne, ye ro us-barag hun-ne ro un nom un rem-us yo-se.

⁵ Ka hun-ne ye peneg moor-to ut-ween. Ye ro un barag-se o-hwaa ne, ye kus o-nip ne á.

Ka hun-ne ye ro m-hyan dor-o Shir yo ken cow-yo yo, yo un kum un hwor.

⁶ Amba hwor-o ro na m-rwo o-zak á. Zak-o jiishte na m-ho, da-o a nome o-dorotte be-de Shir, komo a bupe rii-yo a rotte à kom-ut yoor.

⁷ Remen da-o a matu na à, a haan un rii ne á, komo da-o a mere, a warag un rii ne á.

⁸ Remen kaane, urege a un rii-yo m-re ne un saw-to m-cop ne, a nom o-zak.

⁹ Amba hun-ne ye ro ur-gop ye kumut hwor à, ye m-hebe n-me ut-meger un ceeb ne be-de un rem-se o-hwaa. Con-to un rii yo-yo ro un jorbe un hun-ne un bu-yo m-sabre.

¹⁰ Um zeeg kaane remen con-to un hwor ro takan-de un ko yo ke cow-yo yo un men-ut jaas-to yo. Ye ken ye ho'oste sher-mo un ye remen con-to un nom un hwor hor-m-hor. Bo ye nome kaane

à, m-moka ye ro un swo ur-koob, sa o zee net-wu a m-dwuure ur-wan à.

Burus nak Timoti ut-to

¹¹ Amba wo **Timoti** o shereg be-de Shir. Bo hun-ne ro m-som be-de un rii yo-yo à, som be-de un con-to un hwor deen. O ma'as m-gwoŋ un hun-ne ur-bon ne. O senge nom un rii-yo ro ur-bon ne à. Myet yo wo m-nom à, she'et bo Shir cone o she'et à. Sher be-de Shir. Was un hun-ne ne. Nom jaab-o ut-men un dor-o Shir. Nome hun-ne ut-ma un gwugwer-mo ur-hi ne.

¹² Bo wa-ut-mur ro m-rwo un beeb-de un wu da-o m-sha ut-mur à, ma'as m-sher be-de Shir komo o nome wu o-dorotte hur-ur gaan. Bop kom-ut yoor ka 'yons-de un hoog o ba m-ta o. Baks unze Shir conog o she'et un wu ne har da-o ba m-ta. Komo baks unze o rworog ka ma-to be-de un hun-ne deen ye hogutu wo.

¹³⁻¹⁴ Me wo m-rure o nom o-dorotte un ka ma-to. Shir o ro wan-torse un ma-to um ruru wo à. Shir o ro un 'ya un ko yo ke rii-yo hoog. Yeso **Kiristi** ro komo us-tor. Yeso rurute Panti **Biratus*** ma-to o-nip to ma un wu. Urege o nomog o-dorotte un ka ma-to un hur-ur pus-de, yatt-wu he hyan un rii-yo o-yo'og be un du á. Nom kaane se da-o Yeso **Kiristi** Wan-Koyan na he muun à.

¹⁵ Wu muun ho-de Shir Tato na daage remen wu muunte à. Shir o ro o hun-ne ye un wu ro wu m-'ya ur-bongon à. Wu ro un gwomo-to un ko yo

* **Bor-uş cind:13-14 6:13-14** Hyen komo: Yoha 18:37.

ke rii-yo. Wu ro ko-Gwomo-wu un gwomo ne, wu jiishe m-sek be-de un sek-ye.

¹⁶ Shir o cot ro m-mar á. Wu ro ur-she'et be-de m-cecar. Remen kaane yatt net-wu he m-ha un her-o un wu á. Net ro kon wu take m-hyan un Shir á, komo yatt-wu he wu hoks m-hyan á. Yage hun-ne kap ya'aste wu ut-gos, ut-gwomo ne, to ba m-ta. **Amin.**

*Yoos-de m-sheer be-de Shir
yanze be-de un hwor á*

¹⁷ O rure hun-ne yan-hwor taase ye dek unze ye jiishte or un ye hun-ne. O rure yan-hwor komo taase ye nom us-barag unze rii-yo ye kume à, remen hwor un ye o. Me un zee kaane remen hwor a hoks m-ta hor-m-hor. Amba yage ye sheret be-de Shir o guut ye. Shir o ro na m-ya un ko yo ke rii-yo yo a rotte à, un hur-ur gaan. Shir un ya'as na ko yo ke rii-yo remen a hogute rerem-m na.

¹⁸ Rure ye, ye nome hun-ne rem-se ur-bon un hwor un ye. O bakse yan-hwor ye ma'as m-yar kom-ut yoor, komo ye senge wong un rii-yo ye rotte à.

¹⁹ Da-o yan-hwor nome kaane, sa o zee ye ro un gu un hi un de un ye o ka un ho-de m-buk, remen ye she'ette kashi ur-she'et de Shir cone a she'et à.

Ma-to ur-kom

²⁰ **Timoti**, bop kom-ut yoor remen Shir ya'astu wo senge-mo un yoose un hun-ne Ma-to un wu. O ma'as un yoos un ka **Ma-to m-Rerem** ne bo um yoose wo à. Taase o hoge yan-ma-to o-hwaa. To

ro_ un 'ya_ un Shir m-sek_ á, komo ma-to_ un ka hun-
ne_ ye_ to_ ragaan_ un ma-to_ o-nip ne_ to_ Shir á. Ye_
ro_ m-zee_ yo_ ye_ ur-yoos_ à, ma-to_ o-nip to, to_ Shir,
amba bo-to.

²¹ Ye_ ken_ hun-ne_ ye_ gokste_ gon_ ka_ yoos-de.
Remen kaane, ye_ kus m-she_ un_ yoos-de o-nip de
Shir á.

Yar-mo_ Shir ma'as_ un_ no_ ne_!

ut-Hun

The New Testament in the ut-Hun language of Nigeria

copyright © 2017 Wycliffe Bible Translators, Inc.

Language: ut-Hun

Contributor: WBT Central Zone

All rights reserved.

2025-07-09

PDF generated using Haiola and XeLaTeX on 26 Jul 2025 from source files
dated 9 Jul 2025

c0c13181-081b-50cb-89bb-9a36796100b2